

24 JUN 2003

Nasir-Peluang

USAHAWAN PERLU MANFAATKAN PELUANG DARI PAKEJ EKONOMI

BELURAN, 24 Jun (Bernama) -- Para usahawan dan bakal usahawan perlu memanfaatkan peluang-peluang yang timbul daripada pakej ekonomi yang diumumkan Perdana Menteri Datuk Seri Dr Mahathir Mohamad bulan lepas, kata Menteri Pembangunan Luar Bandar Sabah, Datuk Nasir Tun Sakaran.

Beliau berkata kerajaan sendiri merancang untuk memperkasakan peranan dan kegiatan usahawan kecil dan sederhana (UKS) supaya mereka mampu menjadi pemangkin kepada usaha-usaha yang lebih besar

"Bagi memastikan sasaran dan halatuju itu dapat dicapai, pakej ekonomi telah menyediakan dana yang besar bertujuan untuk menyokong dan mengembangkan aktiviti UKS ini," katanya pada majlis perasmian Program Dialog dan Pameran Produk-produk Usahawan Desa peringkat daerah Beluran di sini hari ini.

Bagi membantu golongan usahawan kecil, kerajaan telah menyalurkan dana berjumlah RM500 juta kepada Bank Pertanian Malaysia untuk mereka yang berkecimpung dalam perusahaan dan perniagaan sektor pertanian menerusi Skim Kredit Mikro, katanya.

Melalui tabung Amanah Ikhtiar Malaysia (AIM) pula kerajaan menyalurkan dana berjumlah RM200 juta yang diletakkan di bawah seliaan Bank Pertanian dan sejumlah RM300 juta lagi disalurkan kepada Bank Simpanan Nasional (BSN) bagi pembiayaan projek yang bukan berteraskan pertanian.

Tabung Ekonomi Kumpulan Usahawan (Tekun) juga menerima suntikan kewangan berjumlah RM200 juta, Tabung Industri Kecil dan Sederhana (Tabung IKS) dan Tabung Usahawan Baru (TUB) pula masing-masing menerima suntikan dana sebanyak RM600 juta dan RM400 juta.

Kesemuanya, yang terkandung di dalam pakej ekonomi itu, adalah usaha kerajaan untuk membantu mempertingkatkan pertumbuhan dan perkembangan ekonomi negara, katanya.

Nasir berkata peluang sebegini tidak seharusnya dipersia-siakan, malah ia patut diambil kesempatan untuk memaju dan mengembangkan usaha sendiri.

Beliau berharap para usahawan mendapatkan segera maklumat lanjut mengenai skim kredit mikro itu daripada institusi-institusi kewangan yang dipertanggungjawabkan oleh kerajaan untuk mengurus dan mengagihkan kemudahan berkenaan.

Kira-kira 100 usahawan dari kawasan pedalaman menghadiri dialog dan pameran selama tiga hari itu yang turut disertai wakil-wakil dari BSN, Bank Pertanian, Amanah Ikhtiar Malaysia dan Tekun yang memberikan penerangan mengenai kemudahan skim pinjaman di bawah pakej ekonomi itu.

-- BERNAMA

MK RON